

Nueva fase pa Izquierda Asturiana

El 19 de mayu de 2012, l'Alcuentru Nacional d'Izquierda Asturiana (IAS) algamaba por amplia mayoría un alcuerdu perimportante na historia del nuestro partíu. Conscientes de que la división interna qu'arrastrábemos dende diba años podía dar nuna rotura que reproduciera los típicos vezos y vicios de la esquierda, esto ye, estrada d'espulsiones, acusaciones y ataques personales, col inevitable alloñamientu de l'actividá política de bona parte de la militancia, y conscientes tamién de que les diferencies polítiques que mos atravesaben yá nun teníen igua dientro del mesmu marcu organizativu, resolvimos pautar una salida negociada: la salida d'IAS del sector militante qu'apostaba pola continuidá de la UNA y del procesu Compromisu, y la salida de la propia IAS d'entrambes dos estructures. Asina, les dos partes quedaben llibres pa continuar la so actividá política pelos caminos que vieren más oportunos.

Foi esta una rotura pautada, pero una rotura, depués de too, y polo tanto nun ye cosa de celebrar el fechu en sí, pero pa los militantes que seguimos apostando pola continuidá d'un proyectu qu'entamamos a construyir va venti años, el de llevar una esquierda del y pal país, venos otra vez énte la posibilidá de rectificar el rumbu equivocáu que lleváemos dende diba años ye un aliviu más qu'evidente.

¿Cómo llegamos a esa situación? Lóxicamente, nun foi d'un día pa otru, polo que ye necesario remontanos dellos años p'atrás pa ver cuándo empezamos a equivocarnos. Ensin ánimu de facer d'esta valoración política una crónica, vemos necesario remontanos dellos años p'atrás pa ver cuándo empezamos a seguir el rumbu qu'agora queremos corrixir.

1. Lleváemos años faciendo mal les coses

IAS salió del BIA en payares de 2001, depués de una esperiencia unitaria con INA y el PCPE que duró más de tres años y qu'acabamos valorando negativamente, por toles razones que nel so momentu espusimos. Entamamos, adúlces, la nuestra andadura en solitario, medrando sele pero constante. Ente avientu de 2002 y xineru de 2003 negociamos la posible participación d'IAS nel Bloque por Asturias, organización formada pola INA y dende la propia IU pa dir xuntos a les eleccionés autonómiques y municipales de 2003. Decíennos que l'alcuerdu ente IU y el BA diba tener como oxetivu arranca-y al PSOE, de perder ésti la mayoría absoluta, concesiones sustanciales como la reforma estatutaria y la oficialidá, y que de nun dase eso, nun habría alcuerdu, y que, d'habelu ente IU y el PSOE, el BA francería'l pautu, y que too ello taba escrito. Dao que nin IU nin el BA almitíen les nuestres condiciones pa llegar al alcuerdu, porque toos dos lo que mos ponín como condición yera la integración ensin más nel BA, refugamos l'alcuerdu, yá que nun acabáemos de fianos de les intenciones de los potenciales aliaos.

A los pocos meses confirmáronse les nuestres rocees, y amás de la pior manera posible. El PSOE perdió la mayoría absoluta, les promeses d'IU-BA, repitíes a lo llargo de tola campaña, escaeciéronse al otru día d'entamar les negociaciones y formóse un gobiernu de coalición que pa lo único que valió foi pa que'l PSOE pudiera seguir aplicando la so nefasta política y un carrapiellu de cuadros d'IU y del BA pasaren a vivir de la política a cambiu de xustificar como inevitables les polítiques que tres meses anantes anatemizaben.

Esa lexislatura, el periodu 2003-07, foi la del trabayu en solitario na construcción d'una esquierda nacional. Adúlces, el partíu medró en militancia y en presencia, formóse una MIAS mui activa y foi articulándose un discursu d'oposición dura al gobiernu de la llamada "esquierda plural" que mos permitió asitianos como una pequeña, pero rial referencia d'esquierda alternativa y asturiana. La cercanía de les eleccionés autonómiques de 2007, el mieu a dir solos a elles, como ocurriera coles xenerales de 2004, y una cierta presión esterna a la que fuimos mui permeables fexeron que na seronda de 2006 entamaren los contactos con Andecha Astur col envís de dir xuntos a les eleccionés de 2007. El resultáu yá ye conoció: Andecha Astur franció a lo primero de 2007 y fuimos a les eleccionés col sector mayoritariu que, presumíase, tenía la lexitimidá del so llau. Les negociaciones fexéronse mal porque

veníen condicionaes pola priesa electoral, nun hubo tiempo abundu pa facer un debate curiosu ente la militancia sobre la conveniencia o non del alcuertu y na práctica vímonos superaos polos acontecimientos.

Con *Los Verdes-Grupo Verde* de tercer sociu de la coalición, fuimos a unes elecciones aliaos con una organización que tenía les sigles en disputa, cosa que condicionó tol procesu hasta'l puntu de que, yá entamada la campaña, vimos anulada una llista electoral (Xixón) y la presencia d'Andecha Astur como tala na mesma coalición. Sicasí, nunes condiciones de lo más revesoso, el resultáu foi ruinu pero non catastróficu: 4.200 votos (0'7%) y 4 conceyaes venceyaos d'una forma o otra a la coalición.

La xestión del procesu poselectoral foi mala. Renunciamos a la posición de fuerca que mos daba la propia dinámica de los acontecimientos pa cayer nun bilateralismu absurdu que paralizó tol procesu unitariu. Procesu que, en cuenta de servir pa facer una IAS más fuerte, valió pa debilitala, al seguir alantre la amarraza xudicial poles sigles d'Andecha Astur ente los dos sectores engarraos, facer debates internos ensin anticipanos a los acontecimientos y sufrir argayos como'l de MIAS. D'otru llau, la crisis del partíu en Piloña, aunque nun guardaba rellación directa col procesu unitariu con Andecha, valió pa debilitalu tovía más.

Les elecciones xenerales de marzu de 2008 y el so catastróficu resultáu (poco más de 800 votos), aunque tuvieren la virtú de facer reaccionar a IAS y reorientar el procesu unitariu, dexaron graves problemas estructurales dende l'aniciu: baxada de militancia, renunciés programátiques, asunción d'un nome claramente inviable, revesosu de desplicar na sociedá asturiana, perda de la ilusión xenerada ente sectores simpatizantes del procesu, y continuidá del pleitu llegal pola sigla Andecha ente los dos sectores, lo que dexaba na provisionalidá permanente la denominación y naturaleza del otu sociu de la federación.

El periodu 2008-11 foi el de la cristalización del proyectu d'UNA, y nel so desendolque vióse claramente que nun diba na direcció que se marcara nel aniciu: la federación convirtiéase nun partíu *de facto*, al nun tener vida orgánica les partes integrantes, renunciase a facer proselitismu pa IAS dientro y fuera de la UNA, y dexar de tenese debates internos na organización. La obsesión por construir UNA púnxose per delantre de seguir construyendo IAS, polo qu'en rialidá, más que favorecer l'espoxigue de la organización, torgábase. Los propios debates internos de la UNA perdieron fondura, al tener que rebaxar conteníos pa contentar unes sensibilidaes que, a la fin, acabaron abandonando'l proyectu. Nun hubo debate teóricu, y yera normal que nun lu hubiera na UNA, porque nun taba pa eso, pero tampoco lu hubo n'IAS porque nun había vida partidaria, y eso foi un problema que, col pasar de los años, acabó notándose.

El trabayu militante cayó a mínimos. Aunque yera un problema que yá veníemos teniendo dende IAS, n'UNA llegó a unos niveles mui superiores, yá que con un númberu teóricamente mayor d'afiliaos, el nivel de militancia yera menor, como podía vese na presencia nos movimientos sociales o nes movilizaciones, sacantes les llingüístiques. Y eso combinábase delles veces con un discursu teóricu radicaloide, que sonaba ridículu cuando la presencia sindical o nos movimientos yera mínima. Facer discursu escontra CC.OO. o UGT en defensa d'un supuestu sindicalismu alternativu y de movilizaciones más radicales cuando nun había militantes abondos dispuestos a tar nesos sindicatos, plantegar eses movilizaciones o simplemente dir nun piquete, yera cenciellamente un exerciciu de radicalismu de salón.

L'ausencia de debate teóricu y estratéxicu llevó al puru tacticismu, a facer les coses siempre pa salir del pasu, y eso llevónos a decisiones mui equivocaes como dir a unes elecciones europees en solitario, con un problema sobreveníu como foi el de los avales de la candidatura, onde'l temple de la organización vióse pelos suelos, y los intentos d'ingresu nuna organización internacional, l'Alianza Llibre Europea (ALE), de duldosa afinidá colos postulaos políticos de la UNA y IAS, y con integrantes nes antípodas del nuestro proyectu.

Neses condiciones, y conscientes de lo feble que taba la organización como pa encarar unes elecciones municipales y autonómiques en solitario, les de 2011, y coincidiendo amás cola salida del gobiernu del Bloque por Asturias na primavera de 2010, l'únicu escenariu que

pasó a contemplar una parte de la organización foi el de dir, como fuera, acompañaos al procesu electoral, cuanto más mimetizaos meyor.

2. La coalición BA-UNA: crónica d'un proyectu inacabáu

El II Congresu d'UNA, celebráu n'Uviéu en marzu de 2010, más que pa relanzar el proyectu, al traviés de la estratexa del Espaciu Políticu Asturianu (d'equí en delantre, EPA), sirvió pa presentar un marcu amañosu pal BA, en casu de qu'esti decidiera colar del gobiernu. Al marxe de que resulta como mínimo estraño qu'un congresu d'una federación de partíos onde s'aprueba una nueva estratexa (l'EPA) nun venga precedíu d'un debate previu nos partíos que conformen esa federación, la rialidá ye qu'esa escenificación venía dada pol mieu mentáu anantes a tener que dir solos a les elecciones. Asina, nos meses anteriores y posteriores al congresu, rebaxóse enforma la dureza de les crítiques al gobiernu de la *esquierda plural*. Por eso cuando en mayu de 2010, dos meses depués del congresu, el BA salía del gobiernu del PSOE-IU, bona parte de la organización entamó a trabayar pa llegar a una alianza col Bloque como única hipótesis de trabayu. Nun importaba que'l BA nun fexera la menor autocrítica de la so participación per seis años nun gobiernu que nós mesmos -IAS primero, y UNA depués- definiéramos como de lo más nefasto na historia autonómica, ye qu'amás reivindicaben arguyosos la so participación nel mesmu. D'otru llau, que'l propiu BA s'autoproclamara la fuercia hexemónica de la izquierda nacionalista, y que la propia UNA lo asumiera, siendo falso como yera daquella, yá ponía les blimes pal cestu de la coalición Bloque-UNA en condiciones de subordinación del nuestro proyectu.

Tolo que vieno depués, como un 8 setiembre fechu pa escenificar la previsible coalición, o les propies negociaciones col BA, fexéronse contemplando la coalición con esta organización como única hipótesis de trabayu. La propia participación del exdirixente d'IU Francisco Javier González Valledor, que yera lo que rialmente podía servir de revulsivu y ser el detonante d'una alternativa más amplia que la simple suma aritmética del Bloque y la UNA, subordinóse en tou momentu a nun incomodar al BA, pal que la propia figura de Valledor yera molesta. Nes condiciones, el resultáu final taba cantáu: Valledor arrenunció a participar nel proyectu en xineru de 2011, con él desapareció bona parte de les persones independientes que podíen sofitar la iniciativa y, a cuatro meses de les elecciones, l'alianza col BA y nes condiciones que plantegaba'l BA revelóse como la única opción posible. ¿Había más opciones? Trabayóse pa que nun les hubiera ¿Había más interlocutores? Tampoco se buscaron.

La escenificación de la coalición Bloque por Asturias-UNA cayó amás en graves errores. D'un llau, proyectáronse espectatives irreales de votu y resultaos, colo que los resultaos electorales (6200 votos nes autonómiques casi 7000 y 5 conceyales nes municipales, cuntando les candidatures asociaes) paecieron tovía más probes de lo que yá yeren. Del otru, facer una campaña electoral onde se facía una crítica radical al modelu autonómicu y a los gobiernos que padeciera Asturias estos ventiocho años (discursu tradicional d'UNA, y anantes d'IAS), pero faciéndolo per boca de quien formara parte hasta diba unos meses d'esos mesmos gobiernos per seis años, y amás reivindicándolo, llevó a una situación un tanto esquizofrénica, por nun dicir otra cosa. Too esto con 3 de los 9 miembros de la XEN d'UNA dimitíos, por razones varies, y con parte de la militancia desactivada.

El resultáu electoral reveló lo falso de les espectatives, pero tamién lo errao del análisis. El nuevu ciclu políticu que s'abrió, con un gobiernu en minoría de FAC n'Uviéu, el PSOE na oposición y IU tamién, hexemonizando'l votu de la izquierda, garrónos col pasu cambiáu. Tenemos elementos d'análisis y de crítica pa la situación previa, y una estratexa, equivocada o non, pa desendolcar, pero la nueva rialidá garrónos ensin la una nin la otra.

Los ruinos resultaos electorales, el branu y el propiu cansanciu natural depués de la campaña electoral fexeron apigazar el proyectu Bloque-UNA, siendo les respuestes polítiques que se dieron a la nueva situación mui ruines. La convocatoria electoral de payares al parlamentu español, anunciada como taba, volvió a garranos ensin organización. El nun se presentar a estes elecciones, siendo una decisión acertada, foi una amuesa de debilidá. El garrar esi determín como se fexo, haciendo inviable cualisquier otra posibilidá, yá que'l conceyu abiertu d'UNA convocóse pa depués de qu'entamara'l plazu de recoyida de firmes, ensin cuntar les estrañes, por nun dicir ridículos, maniobres del BA pa improvisar una candidatura

d'esquierda radical, amosó otra vuelta que la improvisación y falta d'estratexa sigúen siendo definitories del proyectu.

Poco pue dicise del llabor de Bloque-UNA na seronda y iviernu de 2011-12. Ensin un debate previu de reorientación estratéxica énte la nueva situación política n'Asturies y nel Estáu, cayóse nun perfil desdibuxáu que facía mui revesoso presentar una alternativa política que nun fuera pro-Cascos o'l bloque que se definía como anti-Cascos (PSOE, IU, PP). El tercer espaciu morrió anantes de nacer, incapaz de presentar una alternativa tanto al neoliberalismu autóctonu como al bloque del comederu.

Los intentos de redefinir el proyectu Bloque-UNA dando-y un nuevu emburrión y abriendo un procesu constituyente rialmente abiertu, siendo bienllegaos anque serondos, topáronse cola convocatoria d'elecciones anticipaes pa marzu de 2012, onde acabaron de pagase los errores d'un añu enteru. El resultáu foi cenciellamente catastróficu, 1600 votos, que mos dexó na marxinalidá más completa y fexo mui revesoso presentar un nuevu proyectu con un mínimu de solvencia. Nun yera mui razonable presentase como la izquierda verde, asturianista "y de los movimientos sociales" cuando la presencia nos mentaos movimientos yera perprobe o directamente nula. Como amuesa, podemos falar de la incapacidá pa comprender fenómenos como'l 15M, al que se despreció nel aniciu, pa depués sumase al so bloque a lo xo y de forma oportunista na manifestación oficial de la huelga xeneral del 29-M; o podemos falar tamién de cómo en plena campaña electoral pa les elecciones autonómiques de marzu, y con una manifestación sindical de 40.000 persones en Xixón, la nuestra presencia fuera poco menos que clandestina, anque polo menos esistió, non como dos meses anantes. ¿Cómo pretender representar al pueblu asturianu cuando nun se ta na cai a un tiempu qu'esi pueblu?

3. Tiempu de refundación

La rialidá púnxonos nel nuestro siti, que ye, anguaño, la marxinalidá política más completa. Nin les organizaciones, nin el discursu de la izquierda nacionalista tán güei presentes nel debate políticu asturianu, sacante sectores mui concretos, nun momentu históricu onde los acontecimientos de los próximos años posiblemente condicionen el desendolque del nuestro pueblu per delles décadas. Asistimos a la muerte del asturianismu políticu, del nacionalismu asturianu talu como s'entendió dende 1974. La necesidá d'una refundación ye evidente, si queremos pantegar una alternativa política al actual estáu de coses.

Sicasí, na UNA l'autocrítica, como nos meses anteriores, brilló pola so ausencia. En cuenta de parase a analizar qué taba faciéndose mal, prefirióse acelerar el procesu de xuntura col Bloque por Asturias nuna nueva estructura política más estable que trascendiera la simple coalición electoral. Lo qu'orixinalmente yera una idea xenerada n'IAS, la d'un procesu abiertu a persones y organizaciones que culminara nun congresu abiertu que diera vida a una estructura unitaria onde pudieren coesistir organizaciones con vida propia pero trabayando a comuña sobre la base d'un programa y una estratexa común, convirtióse nuna escenificación en dos meses del procesu de xuntura del Bloque-UNA mazcarada de procesu abiertu pero con un final decidíu: una federación a dos, la del Bloque por Asturias, con UNA, yá convertida en partíu formalmente.

Nesi contestu, les reflexiones, propuestas o proyectos que pudieren facese dende IAS sobraben. Sentanos a falar, tanto dientro d'IAS, como de la UNA, como nel conxuntu de la izquierda nacionalista, de lo que se fexera mal y había que corrixir; analizar la nueva situación política abierta cola entrada de FAC na política asturiana, el nuevu gobiernu del PP en Madrid y l'agravamientu de la crisis capitalista; ponese a llantar, en serio, les bases d'un proyectu unitariu salíu de la refelesión colectiva, too eso yera innecesario, porque lo que primaba yeren les prieses por iguar el nuevu xuguete col que tentar llevar una alternativa electoral presuntamente homologable, esta vez pa les elecciones de 2015. A la militancia d'Izquierda Asturiana que víemos como, pela vía de los fechos, se desfixera'l pautu fundacional de la UNA, y que reivindicáremos el nuestro derechu a actuar de forma colectiva, nun se mos dio otra alternativa que la salida del Bloque-UNA y la plena recuperación de la nuestra soberanía política.

La rotura, como yá dicíemos anantes, non por pautada ye menos doliosa. A los compañeros que decidieron salir del partíu, namás mos queda desea-yos bona suerte, y que, nun futuru non mui alloñáu, los nuestros caminos vuelvan a xuntase. Nós quedamos pa construir lo que siempre quiximos: una esquierda asturiana.

Entama asina una nueva fase nel nostru partíu. Munches son les coses que tenemos qu'analizar pa ver en qué mos equivocamos. Munches otres pa ver per ónde tenemos qu'enfilar agora'l nostru camín, y nun vamos facelo d'un día pa otru. Los resultaos d'esi debate diremos faciéndolos públicos nos próximos meses. Entama agora una fase de reflexión colectiva acompañada de la necesaria actividá y reorganización partidaria, marcada polos tiempos políticos que dicta la crisis. De lo que tamos comencíos ye de qu'esi procesu saldrá una IAS más fuerte y más útil pa cumplir el so papel, el de ferramienta de movilización social del pueblu asturianu. Somos conscientes de que necesitamos redefinir:

-La nuestra estratexa: La bandera asturianista tienla Cascos, la de la esquierda IU, el tercer espaciu yá lu ocupen otros, y con conteníu mui estremáu del que quiximos nós. Nun importa que l'asturianismu de Cascos seya falsu, o que la pose esquierdista d'IU dure tanto como'l tiempu en que tean ensin posibilidaes de compartir con garantías gobiernu col PSOE, porque la gran mayoría de la sociedá asturiana tovía nun lo ve asina, entamando per aquellos a los que queremos llegar. Tenemos que redefinir asina una estratexa basada na nueva situación política: axenda neolliberal n'España y n'Asturies, desarticulación social que va acelerase nestos años, reforciamientu del discursu centralista, deslexitimación ca vuelta mayor de los partíos turnistes.

-El nostru discursu: ¿Tien xacíu centrar el discursu no identitario cuando la gran mayoría de la sociedá asturiana nun ve la so identidá como contradictoria cola española? ¿Tienlo articular un discursu d'esquierda asumiendo como esquierda al PSOE? ¿O mimetizando'l discursu d'otres rialidaes polítiques mui estremaes de la nuestra? Fai falta una redefinición del discursu que ponga nel centru del proyectu el republicanismu federalista como elementu vertebrador d'una nueva tradición política asturianista, mirando tanto p'atrás, aprendiendo de les esquierdes y del asturianismu que mos precedió, y p'alantre, proyectándolu hacia les nueves rialidaes y los nuevos desafíos del pueblu asturianu.

-La nuestra estructura: Necesitamos redefinir les estructures que queremos pa esi proyectu. Necesitamos un partíu con un discursu doctrinal fuerte, xenerador de discursu y de cuadros políticos, llaboratoriu d'idees, coesistiendo nun movimientu cimble de persones y colectivos que furrulen de forma autónoma pero sobre la base d'un programa común. Los "partíos de partíos" reveláronse inviabiles porque nunca llegaron a furrular como talos. La unidá orgánica nuna sola fuercia nun sirve p'acumulales, sinón pa perder más pel camín. Necesitamos redes de sociabilidá, dende ateneos a asociaciones de toa triba, que converxan en períodos electorales o de campaña política unitaria sobre la base de referéndums internos y elecciones primaries pa elexir candidatos, y necesitamos sobre too asumir dos coses: que l'acumulación de fuerces electorales a curtiu-mediú plazu ye poco menos qu'imposible, polo que yá podemos dexar de suañar col famosu diputáu "pa la próxima elección" -que siempre ye la siguiente-, y una segunda cuestión, como ye l'asumir que la estructura de la que mos dotemos ye pa dir a la movilización social. Nun se cambia la sociedá a güelpe de comunicaos, y muncho menos cola que ta viniendo.

Nesa xera, y na de la movilización social en defensa de los derechos individuales y colectivos d'esti pueblu, Izquierda Asturiana (IAS) fai un llamáu a tolos sos militantes y simpatizantes a la participación y al trabayu. La causa merezlo.

N'Asturies, en xunetu de 2012

Dirección Nacional d'Izquierda Asturiana (IAS)